



ԿոՄիտաս

Սիրանոյշին 1909, 1 փետրվարի, Սուրբ Էջմիածին

Ինչպէս արտայայտեն սրտիս անգուսպ խնդակցութիւնը Ձեզ, որ արհաւիր
անցաք հայ բեմի խաւարչտին ասպարիգով եւ 35 երկար ու ձիգ տարի շիտակ
ճանապարհ հորդեցիք: Դուք 35 տարի անդադար գեղարուեստի մութը ձեռն,
անվեհեր կոեցիք, կոփեցիք, ամեն խոչ եւ խոթ ոչնչացրիք, Ձեր տոկուն կամքի
թափով արծուի պէս սլացաք հասարակութեան հորիզոնից վեր, շատ վեր,
թագաւորեցիք սրտերի եւ մտքերի վերայ. ապա հզօրեղապէս ձգեցիք, տարաք եւ
Ձեզ հետ, բարձր, հանեցիք դէպի ազնիւ գեղարուեստի կանաչագգեստ ու
կենսունակ բլուրն ի վեր հասարակութեանն էլ: Այնտեղ ցոյց տուիք նորան Ձեր
ստեղծած հրաշալիքները՝ կեանքի մի շարք, պայծառ ու խաւար, ազնիւ ու
կոպիտ... կենդանի տիպեր, արձանագրեցիք նորա սրտի ու հոգու խորունկ
աշխարհներում. պատկերներ ու նկարներ արձանացուցիք, որոնք չեն թոշնում
բնութեան ո՛չ մի արհաւիրքից, որոնք շեշտակի թափանցում են մէկ սրտից միւսն
օղակելով, մէկ հոգուց միւսը շղթայելով:

Ի՛նչ անելի դժուար բան կայ, քան սրտեր ու հոգիներ տաշելը եւ այն այնպիսի
միջնավայրում, ու գեղարուեստը դեռ հաւասար է ժամանցի: Բայց Դուք ժրաշան
մեղուի պէս 35 տարի շարունակ թռաք մէկ բեմից միւսը եւ գեղարուեստի
մարգերից, բազմապիսի ծաղիկներից հաւաքեցիք առատ հիւթ, որպէսզի հայ
բեմի փեթակը լցնելու օժանդակէք: